

TEZĂUR LITURGIC
1 IANUARIE

ACATISTUL
SF. IERARH
ATANASIE
VOLHOVSKI,
EPISCOPUL
MOGHILEVULUI
ȘI POLOŢKULUI
I



MOSCOVA, 2000



Акафист святителю Полтавскому Афанасию

Кондак 1

Избранный от юности угодниче Христов, славу
мира нивчтоже вменивый и Господу
последствовать возжелевый, темже поношения
и гонения паче хвалы вменил еси, и даже до
смерти о Церкви Святых болезновал еси, сего
ради зовем ти умильно:

Радуйся, многоскорбный святителю Афанасие,
радости небесныя причастниче.

Икос 1

Ангелов собеседника и земным скорого
помощника воспети дерзаю, грешный аз. Ты же,
отче святой, Афанасие великоимените, не
отвергни теплую молитву сердца моего, но яко и
в прежняя лета скорбящим и недужным помогал
еси, тако и ныне услыши мене, смиренного,
поющего ти сице:

Радуйся, даре Божий нарочитый;

Радуйся, бессмертия соименитый.

Радуйся, смиреннейший на земли;

Радуйся, превознесенный на небеси.

Радуйся, молитвы грешников приемляй;

Радуйся, никогдаже просящих отреваяй.

Радуйся, красото Церкви изрядная;
Радуйся, утверждение Православия крепкое.
Радуйся, многоскорбный святителю Афанасие,
радости небесныя причастниче.

Кондак 2

Видяй от млада благия примеры жития
христианскаго, возгорелся еси сердцем, да
Христу поработаеши во всем житии твоём, поя
Ему в радости: Аллилуиа.

Икос 2

Разум Божественный имети возжелев, вдался
еси во учение книжное. Постигая же от
премудрости Евангельския, абие высекал еси
мудрости словеса на скрижалях сердца твоего;
темже и слышиши от нас:

Радуйся, усердный слушателю Божественных
учений;

Радуйся, тем избегший вечных мучений.

Радуйся, уставов отеческих послушателю
смиранный;

Радуйся, за смирение твое Богом
превознесенный.

Радуйся, в вертограде Христовом неленостно
трудивыйся;

Радуйся, руце на рало положивый, николиже
вспять обративыйся.

Радуйся, огонь искушений приавый радостно;

Радуйся, прохладу Небеснаго Царствия вкушая сладостно.

Радуйся, многоскорбный святителю Афанасие, радости небесныя причастниче.

Кондак 3

Силою свыше во священстве облеченный, дерзновенно пред всеми исповедал еси Христа распята, Емуже во вся дни жизни Твоея с веселием сердца воспевал еси: Аллилуиа.

Икос 3

Имущи попечение о Церкви Святых, всего себе предал еси на служение ближним, обители устрояя и спасения всем всячески ища. Сего ради, подвигом твоим дивящися, взываем ти:
Радуйся, иноческия обеты радостно принесый;
Радуйся, паству Христову добре упасый.
Радуйся, пастырь добрый иноком бывый;
Радуйся, всякаго сердечно возлюбивый.
Радуйся, обителей усерднейший строителю;
Радуйся, иноков изряднейший правителю.
Радуйся, ликом небесным сопричтенный;
Радуйся, яко злато в горниле искушенный.
Радуйся, многоскорбный святителю Афанасие, радости небесныя причастниче.

Кондак 4

Бури житейския и треволнения мирския яко не сущая восприял еси, темже и в подвизех иноческаго жития быв, послежде же и архиерейства сподобився, к горним очи возводил еси всегда, смиренно Богови поя: Аллилуиа.

Икос 4

Слышав святитель Афанасий бедствия народа Божия, лестию от Церкви Православныя отторгнутого, возревнова о спасении заблудших. Темже и многих обратил еси ко истинней вере, яко да и тем вопити прилежно:

Радуйся, истиннаго единства Церкви ревнителю;
Радуйся, заблудших усерднейший просветителю.

Радуйся, неверия обличителю златословесный;

Радуйся, веры возвестителю известный.

Радуйся, неверным Евангельским гласом вещаяй;

Радуйся, златыя слова верным испущаяй.

Радуйся, с любовью руце к заблудшим простираяй;

Радуйся, от ереси, неверия и раскола отвращаяй

Радуйся, многоскорбный святителю Афанасие,
радости небесныя причастниче.

Кондак 5

Боготечною звездою шествовал еси, отче, иго
благое несый, на всяком месте яко странник
быв, в сердце своем Горнее отечество имеяй, и
тамо ныне водворяясь, со ангелы и лики святых
воспеваеши: Аллилуиа.

Икос 5

Видеша ближнии и дальнии, како ты, отче
блаженный, в смирении и кротости иго
Христово несеши, и возрадовашася, таковый
образ терпения и злострадания вольного имуще;
сего ради и воспевают ти похвальная:
Радуйся, града Полтавы доброе прозябение;
Радуйся, града Твери благое воспитание.
Радуйся, Великаго Нова града украшение;
Радуйся, града Петрова красото.
Радуйся, града Могилева крепосте;
Радуйся, всякаго града и места сладосте.
Радуйся, обители Мгарския покровителю;
Радуйся, обители Полтавския охранителю.
Радуйся, многоскорбный святителю Афанасие,
радости небесныя причастниче.

Кондак 6

Проповедником истины быв, никакоже
неправды убоялся еси, обаче о Церкви Святией
болезновав, волею смирил еси себе, никоеяже
славы взыскуя, токмо бы никтоже тебе ради да

не преткнется, ниже да возбраниши кому пети: Аллилуиа.

Икос 6

Возсия житие твое, яко солнце, и яко звезда на тверди церковней в нощи скорбей, сего ради люди Божии умильно взывают ти умильно:

Радуйся, апостолом в проповедании равный;
Радуйся, с богоглаголивymi пророками славимый.

Радуйся, с мучениками ликовствуяй;

Радуйся, со исповедники торжествуяй.

Радуйся, преподобных соревнователю;

Радуйся, праведных подражателю.

Радуйся, святителей удобрение;

Радуйся, всех добродетелей соединение.

Радуйся, многоскорбный святителю Афанасие, радости небесныя причастниче.

Кондак 7

Хотящу Христу бóльшая тебе благая даровати, и чрез огонь искушения на небеса возвести, ничтоже вопреки глагола еси, Афанасие богомудрый. Темже и искушен быв, искушаемым имаши власть помогати, да спасеннии от бед, всегда воспевают благих Подателю Богу: Аллилуиа.

Икос 7

Новаго смысла взыскав, ветхий разум всяко отложил еси, и, к горним устремляя помыслы, дольняя же возненавидев, в смирении и бесславии конец жития твоего скончал еси.

Преселився же в горняя, тамо слышиши пение ангельское, от человек же приносимыя тебе обрадования таковыя:

Радуйся, образу от мира отречения;

Радуйся, красото крайняго смирения.

Радуйся, скорби радостно претерпевый;

Радуйся, болезни в веселии понесый.

Радуйся, безумия мира обличителю;

Радуйся, красоты душевныя усердный хранителю.

Радуйся, ветхаго человека отвергийся;

Радуйся, во Христа оболкийся.

Радуйся, многоскорбный святителю Афанасие, радости небесныя причастниче.

Кондак 8

Странник и пришлец быв на земли, в горняя вселился еси, блаженне страдальче, и ныне пребываеши, идеже несть болезнь, ни печаль, ни воздыхание, но бесконечная и вечная жизнь, и пение всеумиленное Господеви Жизнодавцу: Аллилуиа.

Икос 8

Весь любовью ко Господу пламеней, стужи страданий и хлада греховного не убоялся еси. Ведый бо, яко во благое вся творит Христос любящим Его, и нас научаеши видети благую и совершенную волю Божию; мы же тебе, нашему учителю и заступнику, песненно поем со апостолом:

Радуйся, яко скорбь ты от любви Христовой не отлучи;

Радуйся, яко теснота ты любить Христа научи.

Радуйся, яко гонение любви твоей не умали;

Радуйся, яко беда паче огонь любви в тебе распали.

Радуйся, яко меч клеветы тебе пройде душу;

Радуйся, яко препобедил еси настоящая и грядущая.

Радуйся, небесная блага возлюбивый;

Радуйся, всегда в любви Христовой пребывый.

Радуйся, многоскорбный святителю Афанасие, радости небесныя причастниче.

Кондак 9

Всякия поношения претерпел еси, отче наш Афанасие, клеветы же и укроения неправедныя. Обаче в клети сердца твоего затворився, и врагов твоих простив, во смирении Господеви воспевал еси: Аллилуиа.

Икос 9

Ветия сладкогласный и пастырь добрый был еси, отче, еще же и инок ревностный и молитвенник преизрядный. Сего ради мы, паства твоя, поем ти:

Радуйся, овчате заблуждшаго взыскателю;

Радуйся, богомудрый паствы наказателю.

Радуйся, добре пасый паству словесную;

Радуйся, всякаго приведый на пажить небесную.

Радуйся, яко глас твой овцам известен;

Радуйся, яко образ твой пред Богом многочестен.

Радуйся, яко пищу даруеши нам пищу чудесную;

Радуйся, яко надежду нам подаеши непрелестную.

Радуйся, многоскорбный святителю Афанасие, радости небесныя причастниче.

Кондак 10

Спасти хотяй душу обидащаго тя, ничтоже вопреки глагола еси, Христови подражая, и за обидащаго молился еси. Мы же, таковое твое смиренномудрие зряще, похваляем тя, Подвигоположнику Христу поюще: Аллилуиа.

Икос 10

Стена храма соборнаго сокры до времени
святыя мощи твоя, обаче во время
благопотребно архипастырь же и пастыри, с
сестрами обители Крестовоздвиженския,
обретоша мощи твоя; ихже лобзающе, воспеша
ти сладце:

Радуйся, сокровище обители твоей даровавый;
Радуйся, мощи твоя от безбожных премудре
сокрывый.

Радуйся, архиереев возвеселивый;

Радуйся, инокинь обрадовавый.

Радуйся, хулители посрамивый;

Радуйся, вся верныя просветивый.

Радуйся, правды Божией блюстителю;

Радуйся, истины Христовой ревнителю.

Радуйся, многоскорбный святителю Афанасие,
радости небесныя причастниче.

Кондак 11

Пение воспевают ти архиереев лица, инокини
же покланяются, и мирстии умиляются, и
всякий род и звание приемлет от святых мощей
твоих благодатныя вспоможения, воспевают же
вси Творцу и Избавителю Богу: Аллилуиа.

Икос 11

Света податель Господь просвети тебе еще в
житии твоём, темже и по смерти твоей подает

исцеления всем, притекающим к четным мощем твоим, и тако вопиющим:

Радуйся, руце простирающим к мощем твоим исцеляяй;

Радуйся, нозе, на поклонения текущая, абие здравы сотворяяй.

Радуйся, от страсти винопития отвращаяй;

Радуйся, к любви Христовой грешников приводяй.

Радуйся, от неправедных клеветы избавляяй;

Радуйся, скорбных скоро утешаяй.

Радуйся, скорых услышателю в нуждах сущих;

Радуйся, благий помощниче тебе чтущих.

Радуйся, многоскорбный святителю Афанасие, радости небесныя причастниче.

Кондак 12

Благодать восприемлем вси, мощем твоим прикасающиеся, и иконе твоей покланяющиеся. Дарова бо нам преизобильный источник исцелений и чудес Господь, Емуже поем всегда: Аллилуиа.

Икос 12

Поюще тя песненно, восхваляем дивнаго во святых Своих Господа, Иже дарова нам сокровище духовное, мощи твоя святые, тебе же предстателя и молитвенника воздвиже Господь на утешение и ободрение людям Своим. Мы же,

толицей милости благодарни суще, воспевати дерзаем:

Радуйся, в бедах утешение;

Радуйся, в скорбех ободрение.

Радуйся, духовное христиан веселие;

Радуйся, тихое верных радование.

Радуйся, от бед всяческих верное избавление;

Радуйся, неверным и сумнящимся вразумление.

Радуйся, людей верных просвещение;

Радуйся, Полтавы крепкое охранение.

Радуйся, многоскорбный святителю Афанасие, радости небесныя причастниче.

Кондак 13

О, многоскорбный святителю Афанасие, в житии крест тяжкий неправедных гонений и клеветы понесый! Испроси нам у Господа всякия скорби претерпети, токмо да Его, Сладчайшаго, не отвратится, и путем спасения верно шествуем, с тобою же и всеми святыми поя Христу всерадостное пение: Аллилуиа.

Сей Кондак читается трижды, после же снова Икос 1 и Кондак 1

МОЛИТВА

О, славный угодниче Христов, великоимените отче наш Афанасие! О, многоскорбный святителю Божий, в житии крест тяжкий понесый и в верности Христу даже до смерти

пребывый! О, смиреннейший на земли, на небеси же прославленный! Помолися о нас ко Господу, имаши бо дерзновение к Нему молиться! Помяни всех, с верою приходящих к тебе и мощем твоим кланяющихся [икону твою святую лобзающих]! Воззри на скорби и клевету, нас облегающая, расторгни узы грехов и мрежи страстей, связующия души наша. Дажь нам помощь молитвами твоими, да укрепит Господь наши силы и наш ум, умерщвляемые грехами. Яко да твоим предстательством пособствуеми, ограждаеми крестным знамением и помогаеми Пресвятою Госпожею Девкою и Богородицею, проживем в благочестии и чистоте и, тако достигнув вечера жизни нашея, отыдем к незаходимому Свету — Христу, Ему же со Отцем и Духом слава подобает, ныне и присно и во веки веков. Аминь



ПОЛНЫЙ АКАФИСТНИК КАНОНИЧЕСКИЙ

АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ

I

НОВОЕ
* НЕБО